


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-95	At-Tiin	8	1	Makkiyyah	Ke-28	2



Zaman Diturunkan

Surah at-Tiin diturunkan pada peringkat kedua kehidupan Rasulullah di Mekah di antara tahun ke-4 hingga ke-5 Kenabian selepas da'wah terbuka bermula. Pada ketika itu da'wah Islam didustakan, cerdik pandai Quraisy pula menimbulkan bermacam-macam keraguan tentang adanya balasan baik dan buruk di hari kiamat nanti.

Perkaitan Surah At-Tiin Dengan Surah Sebelum Dan Selepasnya

1. Surah at-Tiin seperti 2 surah sebelumnya, Ad-Dhuha dan al-Insyirah mengandungi unsur tasliah kepada Rasulullah s.a.w., menerusi firman Allah **فَمَا يُكَذِّبُكَ** terdapat berita gembira dan ramalan tentang masa depan yang cerah untuk Islam.
2. Di dalam surah ini orang-orang yang tidak beriman dan beramal shaleh disebut sebagai **أَسْفَلَ سَفِيلِينَ**, melalui Surah al-'Alaq akan datang satu contoh seperti sikap Fir'aun yang ditunjukkan oleh salah seorang ketua dan kepala musuh Islam di zaman Rasulullah.

Beberapa Kata Kunci Dan Tema Utama Surah

1. **التين** adalah bukit Tiin atau bukit Judi di mana bahtera Nabi Nuh berhenti setelah surut banjir besar yang berlaku di zamannya atau ia isyarat kepada bukit di mana Nabi Adam dan anak cucunya pernah tinggal di situ, mungkin juga ia kawasan Syam dan Palestin di mana begitu ramai nabi-nabi telah diutuskan tinggal dan berda'wah di kawasan itu.
2. **الزيتون** bermaksud bukit Zaitun, mungkin sekali yang dimaksudkan dengannya ialah bukit di Baitul Maqdis di mana Nabi 'Isa selalu memberi nasihat dan bimbingan kepada pengikut-pengikut setianya.
3. **طور سينين** ialah bukit di mana Nabi Musa dikurniakan syari'at.
4. **البلد الأمين** ialah Mekah di mana Rasulullah s.a.w. buat pertama kali menerima wahyu berupa al-Qur'an.
5. Pengajaran yang disampaikan oleh sekalian nabi berupa dalil **نقلي** menjadi saksi bahawa manusia terbahagi kepada 2 golongan. Golongan pertama dipanggil golongan yang berada dalam **أَحْسَنَ تَقْوِيمٍ** (dalam keadaan paling sempurna), golongan kedua ialah golongan yang menolak suara fitrah sehingga ia menjadi **أَسْفَلَ سَفِيلِينَ** (golongan manusia yang paling teruk).
6. Manusia dari golongan pertama menerima **خير** (kebaikan) dengan senang hati, manusia dari golongan kedua pula tidak mahu meninggalkan **شر** (keburukan), pertentangan di antara baik dan buruk, **خير** dan **شر** memang wujud semenjak azali kejadian manusia lagi.
7. Golongan yang menerima **خير** (kebaikan) beriman dan beramal shaleh, kerananya mereka mendapat **أَجْرٌ غَيْرُ مَمْنُونٍ** (pahala dan ganjaran yang tidak putus-putus).
8. Golongan yang menerima **شر** (kejahatan dan keburukan) tidak beriman dan tidak beramal shaleh,

kerananya ia menjadi أَشَقَل سَفِيلِينَ yang hanya layak berada di neraka jahanam.

9. Jika pertentangan di antara خير dan شر (baik dan buruk) wujud semenjak adanya sejarah manusia di bumi dan dalil-dalil نقلی daripada sekalian nabi juga membuktikan kebenarannya, maka wahai Muhammad, siapakah manusia yang waras dapat menolak seruanmu kepada kepercayaan adanya hari kiamat untuk manusia menerima balasan baik dan buruk?

10. `Aqal dan logik juga menerima adanya خير dan شر (baik dan buruk), `aql dan logik juga memutuskan bahawa balasan orang-orang baik dan orang-orang jahat sepatutnya berbeza.

11. Allah s.w.t. bukan sahaja حاكم malah Dia adalah أَحْكَم الحاكمين (hakim yang paling adil). Mana mungkin Allah akan melayan orang-orang yang baik dan orang-orang yang jahat dengan layanan yang sama. `Aql yang sejahtera juga berkata, manusia dari 2 golongan itu semestinya mendapat balasan yang berbeza.

12. Di dalam sesetengah surah al-Qur'an, soalan berada di ayat permulaan, di dalam sesetengah yang lain pula soalan berada pada ayat terakhir. Surah at-Tiin berakhir dengan 2 soalan, melalui 2 soalan itu `aql dan hati kecil manusia disedarkan bahawa balasan baik dan buruk di akhirat semestinya diterima.